

## სამართლიანი წესრიგის ეკონომიკური მნიშვნელობა

ეგნატე შამუგია<sup>1</sup>

საარჩევნო პერიოდში პოლიტიკოსების დაპირებები გულუხვია. ხელისუფლებაში მოსვლის შემთხვევაში, საარჩევნო სუბიექტების დიდი ნაწილი მოსახლეობას სოციალური ტრანსფერების გაფართოებას, სუბსიდიებსა და სამუშაო ადგილების შექმნას ჰპირდება. პოლიტიკური პარტიებისგან კეთილდღეობის გაუმჯობესების ამგვარი დაპირება ლოგიკურია, მაგრამ - უმართებულო. ეს არის შედეგებზე რეაქცია - მათი გათანაბრების მცდელობა და არა - პასუხი ასეთ არასახარბიელო სოციალურ-ეკონომიკური მდგომარეობის მიზეზებზე. ძირითადი დაპირება კი უნდა იყოს არასახარბიელო შედეგების გამომწვევი ინსტიტუციური გარემოს ცვლილება, რაც საწინდარი გახდება გრძელვადიანი კეთილდღეობისა და განვითარებისა.

ინსტიტუციური ეკონომიკის პერსპექტივიდან, სწორედ ინსტიტუტები - საზოგადოებაში თამაშის წესების ერთობლიობა - ხსნის ეკონომიკური კეთილდღეობის განსხვავებულ დონეებს<sup>2</sup>. ფართო ემპირიული ლიტერატურა ხაზს უსვამს ინსტიტუტების განსაკუთრებულ მნიშვნელობას<sup>3</sup>. სამართლიანი და სტაბილური წესრიგის უზრუნველყოფელი ინსტიტუტები უფრო ეფექტიანად გაანაწილებს არსებულ შეზღუდულ რესურსებს, უფრო მეტი სამუშაო ადგილი შეიქმნება, უფრო სწრაფად გაუმჯობესდება პროდუქტიულობა და შესაბამისად, მუშახელის შემოსავლები. ეკონომისტების ნაწილი სწორედ ამიტომ მიიჩნევს, რომ ინოვაცია, ეკონომიკის მასშტაბი, განათლება, კაპიტალის აკუმულირება და ა.შ. არ არის ეკონომიკური ზრდის მიზეზი, არამედ თავად ეს მაჩვენებლებია ზრდა<sup>4</sup>. ეკონომიკური განვითარების საკვანძო

<sup>1</sup> კვლევითი ინსტიტუტი Gnomon Wise, საქართველოს უნივერსიტეტი. e-mail: [e.shamugia@ug.edu.ge](mailto:e.shamugia@ug.edu.ge)

<sup>2</sup> North, D. C. (1990). *Institutions, institutional change and economic performance*. <https://doi.org/10.1017/cbo9780511808678> ; Acemoglu, D., Johnson, S., & Robinson, J. A. (2005). Institutions as a fundamental cause of long-run growth. *Handbook of economic growth*, 1, 385-472. [001: IO. I016/S1574-W84\(05\)OloW](https://doi.org/10.1016/S1574-W84(05)01017-0)

<sup>3</sup> Efendic, A., Pugh, G., & Adnett, N. (2011). Institutions and economic performance: A meta-regression analysis. *European Journal of Political Economy*, 27(3), 586–599. <https://doi.org/10.1016/j.eipoleco.2010.12.003> ; Ugur, M. (2013). CORRUPTION'S DIRECT EFFECTS ON PER-CAPITA INCOME GROWTH: a META-ANALYSIS. *Journal of Economic Surveys*, 28(3), 472–490. <https://doi.org/10.1111/joes.12035> ; Colagrossi, M., Rossignoli, D., & Maggioni, M. A. (2019). Does democracy cause growth? A meta-analysis (of 2000 regressions). *European Journal of Political Economy*, 61, 101824. <https://doi.org/10.1016/j.eipoleco.2019.101824>

<sup>4</sup> North, D. C., & Thomas, R. P. (1973). *The rise of the Western world*. <https://doi.org/10.1017/cbo9780511819438>

ამხსნელი კი ინსტიტუტებია. მათ შორის, განსაკუთრებული როლი აქვს სამართლის უზენაესობას, რომელიც მმართველობითი პრინციპების ერთობლიობაა<sup>5</sup>.

სამართლის უზენაესობა მძლავრი და ამავედროულად, ხშირად განმეორებადი პოლიტიკური იდეალია<sup>6</sup>, რაც კარგია არა მხოლოდ იმიტომ, რომ თავისთავად ხელს უწყობს სამართლიანი საზოგადოების ჩამოყალიბებას, არამედ იმიტომაც, რომ ეკონომიკური განვითარების ერთ-ერთი მთავარი მიზეზია<sup>7</sup>. აქედან გამომდინარე, ღარიბი ქვეყნებისთვის ბილატერალური და მულტილატერალური დახმარების პროგრამების ძირითადი ნაწილი ინსტიტუციური, კერძოდ, სამართლის უზენაესობის გაუმჯობესების ხელშეწყობისკენ არის მიმართული. ამგვარი დახმარებების თვალსაზრისით, გამონაკლისი არც საქართველოა<sup>8</sup>. ჯერ კიდევ დამოუკიდებლობის აღდგენის პირველი ათწლეულიდან, არსებობდა არაერთი საერთაშორისო დახმარების პროგრამა, რომელთა მნიშვნელოვანი ნაწილის მიზანი ინსტიტუციური განვითარების ხელშეწყობა იყო.

### სამართლის უზენაესობის გაზომვა

სანამ საქართველოში სამართლის უზენაესობის მდგომარეობას განვიხილავთ, მანამდე უპრიანია, თავად ამ უკანასკნელის განმარტებასა და გაზომვის საკითხებს შევხვით.

არ არსებობს სამართლის უზენაესობის კონცეფციის უნივერსალური განმარტება და ეს უკანასკნელი რჩება დებატების საკითხად სამართლის, ფილოსოფიისა და პოლიტიკის მეცნიერებს შორის. ავტორთა მიერ გამოკვეთილია მეტად პოპულარული იდეალის როგორც საერთო, ისე განმასხვავებელი ნიშანი. თუმცა საბაზისოდ და კონსენსუსად შეიძლება ჩაითვალოს განმარტება, რომლის მიხედვით, სამართლის უზენაესობა ყველა ადამიანისა და ხელისუფლების სამართლით შებოჭვასა და მათი დაცვის ვალდებულებას გულისხმობს<sup>9</sup>.

<sup>5</sup> Rijkema, P. (2012). The rule of law beyond thick and thin. *Law And Philosophy*, 32(6), 793–816. <https://doi.org/10.1007/s10982-012-9170-1>

<sup>6</sup> Tamanaha, B. Z. (2012). The History and Elements of the Rule of Law. *Singapore Journal of Legal Studies*, 232–247. <http://www.jstor.org/stable/24872211>

<sup>7</sup> The Economist. (2008). Order in the jungle. *The Economist*. <https://www.economist.com/briefing/2008/03/13/order-in-the-jungle>

<sup>8</sup> მაგალითად, 2010-19 წლებში ამერიკის შეერთებული შტატებისგან, სამხედრო დახმარების გარეშე, საქართველომ 1 156.5 მლნ აშშ დოლარი მიიღო. იხ. მეტი U.S. Agency for International Development (USAID). (2023). *U.S. Foreign Assistance, Fiscal Years 1946–2019* [Dataset]. <https://www.foreignassistance.gov/reports>

<sup>9</sup> Bingham, L. (2007). The Rule of Law. *Cambridge Law Journal*, 66(1), 67–85. <https://doi.org/10.1017/s0008197307000037>; Rijkema, P. (2012). The rule of law beyond thick and thin. *Law And*

მიუხედავად იმისა, რომ სამართლის უზენაესობა და მისი განმარტება სხვადასხვა დისციპლინაში საკამათო საკითხია, ამ უკანასკნელის გაზომვაში საერთო სურათი ვლინდება. განსხვავებული გაზომვის პირობებშიც, სამართლის უზენაესობის ინდექსებს შორის განსხვავება ნაკლებად არსებითია და იზიარებს საერთო ტენდენციას, რადგან ყველა ასეთი საზომი ითვალისწინებს საბაზისო პრინციპებს<sup>10</sup>.

### ცხრილი 1: სამართლის უზენაესობის ინდექსების კომპონენტები

კომპონენტი	WGI	HF	FH	WJP
ხელშეკრულების აღსრულება	•	•		
საკუთრების უფლება	•	•		•
კორუფცია	•	•		•
დანაშაული და ძალადობა	•		•	•
სასამართლოს დამოუკიდებლობა	•	•	•	•
სასამართლოს ქმედითობა	•	•	•	•
ხელისუფლების დანაწილება	•	•		•
თანასწორობა	•		•	•
კონტროლი პოლიციაზე	•		•	
ძირითადი უფლებები			•	•
სხვა	•			•

შენიშვნა\* WGI - Worldwide Governance Indicators; HF - Heritage Foundation; FH -

Freedom House; WJP - World Justice Project.

*Philosophy*, 32(6), 793–816. <https://doi.org/10.1007/s10982-012-9170-1> ; Tamanaha, B. Z. (2012). The History and Elements of the Rule of Law. *Singapore Journal of Legal Studies*, 232–247. <http://www.jstor.org/stable/24872211>

<sup>10</sup> Skaaning, S. (2009). Measuring the rule of law. *Political Research Quarterly*, 63(2), 449–460. <https://doi.org/10.1177/1065912909346745> ; Møller, J., & Skaaning, S. (2011). On the limited interchangeability of rule of law measures. *European Political Science Review*, 3(3), 371–394. <https://doi.org/10.1017/s1755773910000421> ; Bergman, M. (2013). The Rule, the Law, and the Rule of Law: Improving Measurement and content validity. *Justice System Journal*, 33(2), 174. <https://tandfonline.com/doi/abs/10.1080/0098261X.2012.10768010> ; Versteeg, M., & Ginsburg, T. (2017). Measuring the Rule of Law: A comparison of indicators. *Law And Social Inquiry-journal of the American Bar Foundation*, 42(01), 100–137. <https://doi.org/10.1111/lsi.12175>

თავად სამართლის უზენაესობის გაზომვა პრობლემურია და არაერთი გამოწვევა არსებობს. აქედან გამომდინარე, სხვადასხვა საფუძვლით, ამგვარი ინდექსების კრიტიკა გაჩნდა<sup>11</sup>. ამ ინდექსებს შორისაა მსოფლიო ბანკის სამართლის უზენაესობის საზომი, რომელიც მმართველობითი ინდიკატორების ნაწილია და ალბათ, ყველაზე მეტად ცნობილი და ხშირად გამოყენებული სოციალური მეცნიერებების კვლევებში<sup>12</sup>. ამავდროულად, ავტორებს ზოგ კრიტიკასა და კითხვაზე პასუხი აქვთ გაცემული<sup>13</sup>. ამრიგად, მმართველობითი ინდიკატორები შეიძლება ჩაითვალოს სამართლის უზენაესობის შეფასების ავტორიტეტულ წყაროდ. ამ ინდექსში სამართლის უზენაესობის კომპონენტი ასახავს წარმოდგენებს, თუ რამდენად აქვთ ეკონომიკურ აგენტებს ნდობა და იცავენ საზოგადო წესებს. კერძოდ, ინდექსი მოიცავს შეფასებებს ხელშეკრულების აღსრულების ეფექტიანობაზე, საკუთრების უფლებაზე, პოლიციაზე, სასამართლოებზე და ასევე, დანაშაულისა და ძალადობის აღბათობაზე.

### სამართლის უზენაესობა და კეთილდღეობა

სამართლის უზენაესობის ეკონომიკური მნიშვნელობა ტერმინის საბაზისო განმარტებიდანაც ჩანს. მისი უზრუნველყოფა ეკონომიკური განვითარებისთვის აუცილებელი წინაპირობაა, რაც დიდწილად ფუნდამენტურ პრინციპს - ხელისუფლების სამართლით შეზღუდვას - უკავშირდება.

ერთ-ერთი ძირითადი პრინციპი შებოჭილი და გაკონტროლებული ხელისუფლებაა, რაც ძალაუფლების დანაწილებით მიიღწევა. წარმომადგენლობითი ორგანოა პარლამენტი, რომელიც კონსტიტუციური შეზღუდვის ფარგლებში იღებს ზოგად წესებს, ხოლო ამ წესების აღსრულებას აღმასრულებელი შტო უზრუნველყოფს. ხელისუფლების დანაწილებაში საკვანძო როლი აქვს სასამართლოს, რომელიც წესებისა და მათი აღსრულების შემოწმებას ახორციელებს. ამიტომ, სასამართლოს, ინდივიდების უფლებებისა და თავისუფლებების დაცვაში, კრიტიკულად გადამწყვეტი ფუნქცია ენიჭება.

<sup>11</sup> Ginsburg, T. (2011). Pitfalls of measuring the rule of law. *Hague Journal on the Rule of Law*, 3(02), 269–280. <https://doi.org/10.1017/s187640451120006x> ; Davis, K. E. (2014). Legal indicators: the power of quantitative measures of law. *Annual Review of Law and Social Science*, 10(1), 37–52. <https://doi.org/10.1146/annurev-lawsocsci-110413-030857>

<sup>12</sup> Kaufmann, D., Kraay, A., & Mastruzzi, M. (2011). The Worldwide Governance Indicators: Methodology and analytical issues. *Hague Journal on the Rule of Law*, 3(02), 220–246. <https://doi.org/10.1017/s1876404511200046>

<sup>13</sup> Kaufmann, D., Kraay, A., & Mastruzzi, M. (2007). The Worldwide Governance Indicators Project : Answering The Critics. In *The World Bank eBooks*. <https://doi.org/10.1596/1813-9450-4149>

ამდენად, ხელისუფლების ფუნქციური დაყოფა უზრუნველყოფს ძალაუფლების ბოროტად, თვითნებურად და კერძო მიზნებისთვის გამოყენების რისკების მინიმიზაციას. მეორე მხრივ, ძალაუფლების თვითნებური გამოყენების შემცირება და ზოგადი წესების სტაბილურობა ხელს უწყობს ეკონომიკაში განუსაზღვრელობის შემცირებას. კერძოდ, კონსტიტუციური წესრიგი ეფექტიანად ამცირებს სამართლებრივი სისტემის განუსაზღვრელობას, რადგან მიისწრაფვის ხელისუფლების მიერ თვითნებობის არიდებისა და ინსტიტუციური სტაბილურობისკენ. განუსაზღვრელობას კი კეთილდღეობაზე უარყოფითი გავლენა აქვს, რადგან, ასეთ დროს, ფირმები აჩერებენ მუშახელის დაქირავებასა და წარმოებაში ინვესტირებას, ეკონომიკური აგენტებისთვის რისკის პრემიუმი იზრდება და ნაკლებია ეკონომიკური აქტივობა<sup>14</sup>.

უპირველეს ყოვლისა, სამართლის უზენაესობა უზრუნველყოფს პერსონალურ უსაფრთხოებასა და დაცულობას<sup>15</sup>, რაც საკუთრების უფლების ნაწილია და მის გარეშე, აზრი არ აქვს ეკონომიკური აგენტების აქტივობას. საკუთრების უფლება და კონტრაქტის აღსრულება ის ძირითადი თეორიული მექანიზმებია, რომლებიც სამართალს აკავშირებს ეკონომიკურ განვითარებასთან<sup>16</sup>. კარგად განსაზღვრული და დაცული საკუთრების უფლება ქმნის სტიმულს ინვესტირებისთვის<sup>17</sup> და უზრუნველყოფს რესურსების მაქსიმალური ღირებულებით გამოყენებას<sup>18</sup>. ამასთან, აღსრულება არსებითია. კონტრაქტის ეფექტიანი აღსრულების გარეშე,

<sup>14</sup> Bachmann, R., Elstner, S., & Sims, E. R. (2013). Uncertainty and Economic Activity: Evidence from Business Survey Data. *American Economic Journal: Macroeconomics*, 5(2), 217–249. <https://doi.org/10.1257/mac.5.2.217>; Iqbal, U., Gan, C., & Nadeem, M. (2019). Economic policy uncertainty and firm performance. *Applied Economics Letters*, 27(10), 765–770. <https://doi.org/10.1080/13504851.2019.1645272>; Kang, W., Lee, K., & Ratti, R. A. (2014). Economic policy uncertainty and firm-level investment. *Journal of Macroeconomics*, 39, 42–53. <https://doi.org/10.1016/j.jmacro.2013.10.006>; Gulen, H., & Ion, M. (2015). Policy uncertainty and corporate investment. *Review of Financial Studies*, hhv050. <https://doi.org/10.1093/rfs/hhv050>; Baker, S. R., Bloom, N., & Davis, S. J. (2016). Measuring economic policy uncertainty\*. *Quarterly Journal of Economics*, 131(4), 1593–1636. <https://doi.org/10.1093/qje/qjw024>; Iqbal, U., Gan, C., & Nadeem, M. (2019). Economic policy uncertainty and firm performance. *Applied Economics Letters*, 27(10), 765–770. <https://doi.org/10.1080/13504851.2019.1645272>

<sup>15</sup> Narayan, D. (2000). *Voices of the poor: Can anyone hear us?*. World Bank. ; Belton, R. K. (2005). Competing definitions of the rule of law: implications for practitioners.

<sup>16</sup> Alchian, A. A. (1965). Some Economics of Property Rights. *Il Politico*, 30, 816–829. ; Alchian, A. A., & Demsetz, H. (1973). The Property Right Paradigm. *The Journal of Economic History*, 33(1), 16–27. <https://doi.org/10.1017/s0022050700076403>; Demsetz, H. (1974). Toward a Theory of Property Rights. In *Palgrave Macmillan UK eBooks* (pp. 163–177). Palgrave Macmillan. [https://doi.org/10.1057/9780230523210\\_9](https://doi.org/10.1057/9780230523210_9); Asoni, A. (2008). Protection of Property Rights and Growth as Political Equilibria. *Journal of Economic Surveys*, 22(5), 953–987. <https://doi.org/10.1111/j.1467-6419.2008.00554.x>

<sup>17</sup> Acemoglu, D., Johnson, S., & Robinson, J. A. (2005). Chapter 6 Institutions as a Fundamental Cause of Long-Run Growth. In *Elsevier eBooks* (pp. 385–472). [https://doi.org/10.1016/s1574-0684\(05\)01006-3](https://doi.org/10.1016/s1574-0684(05)01006-3)

<sup>18</sup> Pejovich, S. (1990). *The Economics of Property Rights: Towards a Theory of Comparative Systems (International Studies in Economics and Econometrics) (1st ed.)*. Springer. ISBN: 9780792308782

მხოლოდ საკუთრების გაცვლის უფლება არ შექმნის ინსტიტუციონალურ გარემოს, რომელიც ეკონომიკურ საქმიანობას წაახალისებს<sup>19</sup>.

როგორც აღვნიშნეთ, აღმასრულებელი დისკრეციის ინსტიტუციური შებოჭვა სამართლის უზენაესობის კონცეფციის თვალსაჩინო ნაწილია, რომელიც დამოუკიდებელ სასამართლოსაც მოიცავს. კლასიკური დროის შეუსაბამობის პრობლემის გამო, ამგვარი შებოჭვა და დაბალანსება ეკონომიკურად მნიშვნელოვანია, რადგან წესი უკეთესია, ვიდრე დისკრეცია<sup>20</sup>. უფრო მეტიც, საკუთრების უფლება და ხელშეკრულების აღსრულება ვერ იქნება სანდო, თუ არ იარსებებს აღმასრულებელი დისკრეციის ეფექტიანი შეზღუდვა<sup>21</sup>. რაც შეეხება სასამართლოს, მის დამოუკიდებლობასა და კონსტიტუციურ შემოწმებას მკვეთრად დადებითი გავლენა აქვს საკუთრების უფლების უსაფრთხოებაზე<sup>22</sup>. უფრო მეტიც, ზოგიერთი ავტორი სასამართლოს დე ფაქტო დამოუკიდებლობას მიიჩნევს, როგორც მთავარ ხელშემწყობ გარემოებას ეკონომიკური განვითარებისთვის<sup>23</sup>.

სამართლის უზენაესობის მნიშვნელოვანი პრინციპია თანაბარი მოპყრობა და პროცედურული სამართლიანობა. თუკი ეს პრინციპი ირღვევა, მაშინ ნაყოფიერი ნიადაგი ჩნდება კორუფციისთვის, ხოლო კორუფციას ეკონომიკურ აქტივობაზე უარყოფითი გავლენა აქვს. ასეთი გარემო ხელშემწყობია რენტის ძიებისთვის<sup>24</sup>, რაც ამაღლებს ხარჯებს

<sup>19</sup> North, D. C., & Institutions, I. C. (1990). *Economic performance* (Vol. 3). Cambridge: Cambridge University Press.

<sup>20</sup> Kydland, F. E., & Prescott, E. C. (1977). Rules Rather than Discretion: The Inconsistency of Optimal Plans. *Journal of Political Economy*, 85(3), 473–491. <https://doi.org/10.1086/260580>

<sup>21</sup> Buchanan, J. M., & Tullock, G. (1965). *The calculus of consent: Logical foundations of constitutional democracy* (Vol. 100). University of Michigan press. ; Hayek, F. A. (1973). *Law, Legislation, and Liberty, Volume 19* (Vol. 19). University of Chicago Press. ; Dicey, A. V. (1982). *Introduction to the Study of the Law of the Constitution* Indianapolis: Liberty Fund Inc. Rev Edition.

<sup>22</sup> La Porta, R., Lopez-De-Silanes, F., Pop-Eleches, C., & Shleifer, A. (2004). Judicial Checks and Balances. *Journal of Political Economy*, 112(2), 445–470. <https://doi.org/10.1086/381480>

<sup>23</sup> Feld, L. P., & Voigt, S. (2003). Economic growth and judicial independence: cross-country evidence using a new set of indicators. *European Journal of Political Economy*, 19(3), 497–527. [https://doi.org/10.1016/s0176-2680\(03\)00017-x](https://doi.org/10.1016/s0176-2680(03)00017-x) ; Voigt, S., & Gutmann, J. (2013). Turning cheap talk into economic growth: On the relationship between property rights and judicial independence. *Journal of Comparative Economics*, 41(1), 66–73. <https://doi.org/10.1016/j.jce.2013.01.007> ; Voigt, S., Gutmann, J., & Feld, L. P. (2015). Economic growth and judicial independence, a dozen years on: Cross-country evidence using an updated Set of indicators. *European Journal of Political Economy*, 38, 197–211. <https://doi.org/10.1016/j.ejpoleco.2015.01.004>


<sup>24</sup> ეკონომიკური კონცეფცია, რომელიც გულისხმობს ერთი ადამიანის ან ერთეულის მიერ საკუთარი სიმდიდრის გაზრდას, საზოგადოებისთვის სარგებლის შექმნის გარეშე. რენტის მაძიებლის საქმიანობა მიზანად ისახავს სარგებლის მიღებას რესურსების განაწილების მანიპულირების გზით.

მწარმოებლებისა და მომხმარებლებისთვის<sup>25</sup>. საერთო ჯამში, აზიანებს ეკონომიკურ განვითარებას<sup>26</sup> და ხელს უწყობს უთანასწორობასა და სიღარიბეს<sup>27</sup>.

### სამართლის უზენაესობა საქართველოში

ბოლო პერიოდის ტენდენციებით, საქართველოში სამართლის უზენაესობის ხარისხი გაუარესებულია. ამაზე მიუთითებს მსოფლიოს ბანკის ხსენებული მმართველობითი ინდიკატორები. აღნიშნული ინდექსი მოიცავს საქართველოს მდგომარეობის შეფასებას 1996-2022 წლების პერიოდში. ასეთივე სურათია ნაჩვენები სხვა ინდექსებშიც<sup>28</sup>.

**გრაფიკი 1:** სამართლის უზენაესობის ინდექსი საქართველოში, (შეფასების ქულა -2.5 – 2.5)



წყარო: Daniel Kaufmann and Aart Kraay (2023)

<sup>25</sup> Krueger, A. O. (1974). The Political Economy of the Rent-Seeking Society. *The American Economic Review*, 64(3), 291-303. <https://doi.org/10.2307/1808883> ; Bhagwati, J. N. (1982). Directly Unproductive, Profit-Seeking (DUP) Activities. *Journal of Political Economy*, 90(5), 988-1002. <https://doi.org/10.2307/1837129> ;

<sup>26</sup> Mauro, P. (1995). Corruption and Growth. *Quarterly Journal of Economics*, 110(3), 681-712. <https://doi.org/10.2307/2946696>

<sup>27</sup> Gupta, S., Davoodi, H., & Alonso-Terme, R. (2002). Does corruption affect income inequality and poverty? *Economics of Governance*, 3(1), 23-45. <https://doi.org/10.1007/s101010100039>

<sup>28</sup> იხილეთ „მსოფლიო მართლმსაჯულების პროექტის“ შესახებ დეტალურად: ქეცბაია, თამარ. (2024). საქართველო სამართლის უზენაესობის ინდექსში. In Gnomon Wise. <https://gnomonwise.org/ge/publications/analytics/190>

მსოფლიო ბანკის პროექტის მიერ 2022 წლისთვის საქართველოში სამართლის უზენაესობის შეფასება დაეფუძნა 9 განსხვავებულ წყაროს, რომლებზე დაყრდნობითაც მიღებული ქულა 0.17-ია, რაც 2021 წელს 0.14 იყო<sup>29</sup>. თუმცა, სამართლის უზენაესობა ბოლო წლებში მკვეთრად შემცირებულია. 2016 წლის მაქსიმალური 0.34-ქულიანი შეფასების შემდეგ, მომდევნო წლებში ინდექსის ნიშნული იკლებდა. ადრეული წლების ტენდენციასთან შედარებით, მდგომარეობა მკვეთრად გაუარესებულია, რადგან 2016 წლამდე სამართლის უზენაესობის ხარისხი ყოველწიურად უფრო მეტით იყო შეფასებული, რაც ხსენებული პერიოდიდან შეიცვალა. ამასთან, საქართველო, სამართლის უზენაესობის კუთხით, ზოგად ტენდენციას ჩამორჩენილია, რადგან თუკი ათწლეულის წინ 200 ქვეყნის შეფასებების განაწილებაში მე-60 პროცენტით იყო, ახლა ეს ნიშნული 55-ე პროცენტითაა.

#### ცხრილი 2: მმართველობითი ინდიკატორების კორელაციის მატრიცა

	RoL	GEF	RQ	CoC	V&A	PST
RoL	-					
GEF	0.93	-				
RQ	0.98	0.96	-			
CoC	0.97	0.88	0.93	-		
V&A	0.85	0.68	0.74	0.89	-	
PST	0.91	0.79	0.86	0.90	0.82	-


შენიშვნა\* RoL - სამართლის უზენაესობა; GEF - მთავრობის ეფექტიანობა; RQ - რეგულირების ხარისხი; CoC - კორუფციის კონტროლი; V&A - მთავრობის ანგარიშვალდებულება; PST - პოლიტიკური სტაბილურობა.

მმართველობითი ინდიკატორები არამხოლოდ სამართლის უზენაესობას, არამედ, ამ უკანასკნელის გარდა, კიდევ ხუთ კომპონენტს მოიცავს: მთავრობის ეფექტიანობას, რეგულირების ხარისხს, კორუფციის კონტროლს, მთავრობის ანგარიშვალდებულებასა და პოლიტიკურ სტაბილურობას. მათ შორის, სამართლის უზენაესობა რეგულირების ხარისხსა და კორუფციის კონტროლთან ყველაზე მეტად კორელირებს.

<sup>29</sup> მინიმალური შეფასებაა -2.5, ხოლო მაქსიმალური ქულაა 2.5.



**გრაფიკი 2:** მმართველობითი ინდექსი საქართველოში, აგრეგირებული (შეფასების ქულა -2.5 – 2.5)



წყარო: Daniel Kaufmann and Aart Kraay (2023); ავტორის გამოთვლები

რეგულირების ხარისხი და მთავრობის ეფექტიანობა ის კომპონენტებია, რომლებშიც, ბოლო ათწლეულის განმავლობაში, მდგომარეობა არ გაუარესებულა, განსხვავებით კორუფციის კონტროლისგან, პოლიტიკური სტაბილურობისა და მთავრობის ანგარიშვალდებულებისგან. ამ უკანასკნელის ხარისხის შეფასება მკვეთრად შემცირებულია, რადგან 0.3-იანი ნიშნულიდან, 2022 წელისთვის, კლება 0.01 ქულამდე<sup>30</sup>. საერთო ჯამში, 2015 წლიდან მოყოლებული, ინსტიტუტების ხარისხის გაუმჯობესება შეფერხებულია, ხოლო, ზოგ შემთხვევაში, მდგომარეობა გაუარესებული.

### დასკვნითი შენიშვნები

საქართველოში არსებული ინსტიტუციური გარემო არასახარბიელოა. მთავარი გამოწვევა კი ისეთი მმართველობის ჩამოყალიბებაა, რომელიც სამართლიან და სტაბილურ წესრიგს უზრუნველყოფს. ასეთი გარემო გარანტიან საზოგადოების კეთილდღეობის, რომლის მიღწევის გზა სამართლის უზენაესობა და მისი ფუნდამენტური პრინციპების ერთგულებაა.

ბოლო წლებში კი ინსტიტუციური განვითარება შეფერხებულია. განსაკუთრებით შელახულია სამართლის უზენაესობის ფუძემდებლური პრინციპები. სწორედ ეს საკითხი უნდა

<sup>30</sup> Kaufmann, D. & Kraay, A. (2023). *Worldwide Governance Indicators, 2023 Update* ([www.govindicators.org](http://www.govindicators.org)), Accessed on 10/07/2024.

იყოს მთავარი პოლიტიკურ დღის წესრიგში, რადგან მნიშვნელობა მაღალია. სამართლის უზენაესობის ნაკლებობა საზიანოა საზოგადოების აბსოლუტური უმეტესობისთვის, რასაც გრძელვადიანი შედეგები აქვს. მიმდინარე პერიოდში ფუძემდებლური პრინციპების ხელყოფა, მომავალში გრძელვადიანი და სტაბილური ეკონომიკური განვითარების შემაფერხებელია. ეს კი პროდუქტიულობის გაფართოების, სიღარიბის შემცირებისა და ცხოვრების სტანდარტების გაუმჯობესების უფრო დაბალ ტემპს ნიშნავს.